



武林稿

明進士兩浙都轉運鹽副使前中順大夫南京太常寺少卿上元許穀著



屈平入楚厥有騷此賈生渡湘吊賦迺作斯皆  
吐忠憤之懷洩幽羈之蘊卓哉尚矣乃其英詞  
朗句照映千古孤臣逐客苟有製寫安得不以  
之爲權衡乎僕以秉銓無狀賴 聖明曲赦近  
謫武林山水滿前簿書希簡非有愁苦寂寞之  
嘆感時撫事觸景會情擲管之際亦有短詠乃  
才性淺劣於六藝無鑽討之功充口率談何關

雅道流之文林貽笑作者往來踰歲詩凡若干  
首雜著一二間附其後比於沅湘之哲雖鍾缶  
異鳴毋亦有懇款之情乎

嘉靖丁未春三月望日

武林稿

詩

將赴謫所辱九卿諸公會餞於神樂觀奉  
謝一首

門人金谿黃希憲刻

碧殿離筵集上卿武林遷客駐雙旌還家謬接  
翔鸞翼去國翻增野鶴情千里風霜催短鬢十  
年南北任浮萍扶持社稷群公在何惜江湖寄  
此生

出都門別同鄉諸公

鄉里衣冠悵遠行百壺供餞出留京風吹征蓋  
翩翩舉雲擁慈輿細細輕北極星辰遙在眼南  
山蘿桂獨關情傍人誤擬長沙傅豈有才華到  
賈生

與薛考功

薛君海內呼才雄五車經史羅心曾揮毫巧奪  
機中錦吐氣直掩雲間虹憶昔從君過燕市獻  
書齊奉臨軒試敢云李杜並聲名實取雷陳比

交誼頃余謬作南宮客君忽分符向東越萬里  
魚書苦不聞三年芝宇空長隔太平天子重考  
功起君特置留都中余且承恩秉銓簿一時南  
北樞機同君性孤高余亦慙寰中道義遙相向  
誰令萋菲遂成文豈知蕙苴還生謗麻姑山深  
松栢青武林地勝烟波平天王神聖許暫去逍  
遙倘遂山水情百年寵辱總非真何必金章乃  
致身此去險夷那用卜不妨歸作耦耕人

答張侍御

青袍白馬黃金羈早年意氣爭相推狂來忽擊  
壯士劍醉後豈顧尚書期天子垂衣四海一彈  
冠總爲清時出相典新飛漢殿霜賈生早別長  
安日十年朋舊倏西東仕路崎嶇嘆不窮君去  
好乘沙苑馬我行獨采吳江楓吳江越嶺堪行  
樂聞道梅花猶未落謬說蘇公興頗長敢云漢  
主恩猶薄眼看負弩滿君前黑頭報主正當年  
風采如君近希有豺虎聞之潛不走所願籌邊  
答紫宸囊封莫薦桐江叟

過吳門訪文丈

吳門風雨獨停舟重訪仙人洞壑幽錦字滿床  
多逸興碧梧千仞自清秋久拋金馬心逾遠一  
笑青山意總投慚愧十年塵土客又將書劍出  
皇州

文丈邀遊石湖

野雲迴合萬峯秋水鳥群飛四望幽塵世再逢  
雞黍會衣冠同泛木蘭舟到來自愛山當面別  
後空傷雪滿頭乘興不須談出處飄飄天地一

浮漚

顧汝和移舟訪于嘉禾有詩見惠答以四

韻

仙舸東來訪逐臣雙停蘭棹越江濱行憐逆旅  
逢殘歲坐喜清尊接故人兩世素交真倚玉十  
年斑鬢漸如銀瑤篇勞贈雲霄句已愧蹉跎報  
主身

入武林

早耽烟壑喜青蒼到處尋幽自畏糧獻策謬登

金紫列移官欣傍水雲鄉六橋波色堪浮艇孤  
嶼梅花任舉觴却笑賈生通達者誤將詞賦吊  
三湘

述志

江南甕牖生讀書寡玄致射策荷天慈謬許立  
銓署手握九流書目檢八區士任大才乃微用  
拙罪非細大聖矜不能落職俾懲艾薄竄吳越  
間長佐魚鹽使內外皆王臣吳越信佳地鞭策  
誠不任鞠躬願從事憶昔雲海游早動烟霞思

幾欲裹糧行况今兼祿仕丹山晚逾妍碧水冬  
猶駛觀闕鎖巖間笙歌振林際盍簪有良朋揮  
毫忽成句既不廢勾稽復此散觀睇不見古哲  
人乞作留司吏謂在喧寂間今余無乃是斥鷃  
本卑棲玄鵬自高翥小大分已成逍遙但從志  
方山考功與余爲湖山之約迨至余以病

違賦詩悵別

共辭南省爲遷客曾許西湖作主人中散高情  
能枉駕茂陵多病阻相親含香有夢驚前事躡  
屐無緣負此辰後會悠悠更何處朔雲寒雨倍  
傷神

訪王元宋二首

謫宦過仙壤逢君說舊盟尊前雞黍會天畔水  
雲情竹樹臨軒發峯霞對酒傾飄飄畏途裏疎  
豁見平生

畫棟焚香處衝寒駐馬頻詩才窮自壯交意晚  
逾親用拙甘投竄名高詎隱淪計時還獻賦留  
詠曲江春

至日

寢園奔走奉 高皇去歲茲辰接鷺行霜露滿  
空冬展祀星河臨殿夜焚香金城四起圍玄隧  
玉儿雙分儼御裳今日孤城身獨竄舊京回望  
白雲長

雪

吳山冬盡雪初飛極浦彤雲合翠微越女臺邊  
猶黯淡蘇公堤上已芳菲他鄉酒盞愁仍把虛  
室琴書淨可依所願普天歌樂歲故園休問幾

時歸

立春

條風收臘序遲日轉韶年雲樹馳鄉夢琴尊伴  
客氈渚梅爭送暖江柳競含烟獨有逃名者灰  
心總不然

新年寄所知

客裏迎嘉節江邊動綵旗晴光催柳葉淑氣轉  
花枝鄉國登樓外勲名覽鏡時遙知盍簪者應  
念賜環期

答陳憲部羽伯

伯玉交情古分襟歲屢移獨憐千里客遙寄四  
愁詩薄劣蒙輕典行藏託故知無由同握手悵  
望白雲司

春日簡楊侍御

竄身來越郡同病得楊雄偃蹇看塵世棲遲坐  
佛宮春容湖水上客思酒杯中莫問成都卜浮  
生任轉蓬

舊慕西臺面今同東海居世途均失馬客舍豈  
無魚拭目看詩草披鱗想諫書他鄉借顏色疎  
謬轉憎予

官舍寓目喜省中舊寮書至

憶驅羸馬走京華回首天門路已賒朱紱十年  
空戀主白雲千里更辭家身依俗世從呼馬地  
在都門想種瓜獨喜同時霄漢侶偏題尺素到  
天涯

孤山訪熊別駕

遙尋別駕停驂處挈榼同過紫翠間何物簪纓

能得意從來江海足怡顏晴空點霧峯巒暗絕  
壑回春草樹斑堤上醉歸燈火滿却疑軒蓋鏡  
中還

萬松嶺

萬樹長松曉霧屯孤亭一眺俯千門懸崖實恐  
藤蘿滑恠石虛疑虎豹蹲湖色近連山靄碧江  
流遙帶海潮奔春來此地堪乘興肯惜緋袍換  
綠尊

春寒

湖上陰雲黯淡垂城邊寒色滿旌旗卽看花藥  
穿林少莫恠鶯聲出谷遲雨後軒楹渾未敞病  
餘狐貉漫相隨丹山每殫登臨興多負高人載  
酒期

次石岡病起之作余時小疾亦間

廊廟江湖隨所適書籤藥裹漫相纏病餘閉戶  
清尊廢雨後登山短屐便賈誼未酬匡世策嵇  
康新著養生篇秦淮春色應無賴腸斷江南二  
月天

昭慶寺訪鄒少府

故人停駕白雲隈  
策馬遙尋夕照殘  
巖畔霞光生殿閣  
水邊春色上衣冠  
細彈長劍看浮世  
漫對清尊續舊歡  
丘壑與君同有志  
風塵應恨未辭官

再疊前韻

客中尋客過旃壇  
閣上梅花半已殘  
散地總宜荷芰服  
清朝空戀鷓鴣冠  
林間日氣薰優鉢  
谷口春風遶合歡  
爲嘆馮唐頭已白  
十年猶自滯

徵官

湖上

春風吹滿舊王畿  
湖上流鶯處處啼  
柳外雕輪還自至  
花間紅袖巧相携  
彩舟徐盪黃金檝  
寶馬爭翻碧玉蹄  
更喜諸天俱接近  
數聲清磬出林西

玉泉寺

南山歷歷行應徧  
此地還藏澗壑幽  
畫棟虛無延暮景  
碧池清淺注寒流  
圖中秀樹千章映  
鏡

裏神魚五色留載酒喜逢王逸少逍遙何羨竹  
林游

止酒

春來斷酒瓶兀坐對溪亭細讀嵇康傳聞披陸  
羽經花枝空自好竹葉爲誰青澤畔逢漁父能  
無笑獨醒

偶成

新作魚鹽吏遙辭龍虎都乾坤無棄物江漢有  
潛夫短笠三山雨扁舟八月鱸懷何日遂把

酒意踟躕

移梅

覓得孤山樹空庭手自栽古根偏偃蹇幽意共  
徘徊細葉相將吐殘花猶自開荒園須着汝留  
伴酒船迴

春寒不止

旭日不肯暖春風何太狂感時占月令對景惜  
年光寂寞花遲發蹉跎柳未芳回暄須不遠消  
息任東皇

病起散步湖上

偶拋藥裹生春興  
閒眺晴湖寄客蹤  
行處烟籠諸寶刹  
望中雲鎖二高峯  
獨憐舟楫花間度  
屢喜袈裟樹裏逢  
莫笑登臨虛酒盞  
茗杯香篆亦從容

登南高峯

南峯高倚白雲間  
湖色江流掌上還  
一望淼茫通渤海  
四圍蒼翠俯群山  
塔邊雙樹晴堪倚  
象外諸天近可攀  
况與故人同躡屐  
長歌應爲破

愁顏

答友人

一官飄泊任乾坤  
市虎蚊雷總斷魂  
湖海未嫌流品賤  
風波惟喜故吾存  
江山且自供吟筆  
日月何曾照覆盆  
閱盡人情從冷暖  
不須重署翟公門

白髮

白髮無端長年來  
苦不停梳頭紛滿面  
攬鏡颯如星  
潘岳年猶壯  
馮唐貌已零  
策勲更何日  
吾

欲問蒼冥

石岡示述懷之作走筆和答

榮名真外物山水卽仙鄉對客但一醉爲官無  
寸長湟中俄夢鹿道上各亡羊世路皆如此浮  
生莫漫傷

清明

東風淡蕩柳芳菲久客俄驚試袷衣日照閭閻  
新火舉烟籠村巷亂紅飛天涯節序聊隨俗海  
內風塵未息機側想舊京懷舊侶水邊高詠暮

同歸

恒兒還悵然作

稚子暫辭親他鄉亦愴神青山空對客黃鳥轉  
愁人自愛文明世誰憐放逐臣還家猿鶴在應  
笑悞風塵

山下謝安宅城邊梁武臺鄉關看汝去懷抱向  
誰開門逕尋常閉松篁取次栽親交如有問將  
欲賦歸來

春日苦雨

春日苦多雨淋浪不肯晴閉門芳草合卷幔小  
池平急吹鳴高樹陰雲壓近城坐看紅錦落空  
有惜花情

紫雲洞

古洞人蹤少危梯鳥道迴瓊瓏一柱立虛豁二  
輪來渺渺玉簫下娟娟瓊蕊開紫雲吹不散流  
影照金杯

聞元兒病

他鄉聞爾病中夜獨心驚况是飄零日可堪兒

女情一官無穢行四海只虛名天意應憐我懸  
知藥有靈

逢與槐知元兒病愈

歸途逢謝晬報爾病全瘳何啻千金惠都銷萬  
斛愁寧心休展卷習靜好登樓稍待清秋日相  
携爛熳游

列子御風圖

拂袖出寰中冷然獨御風委形觀造化信意入  
鴻蒙蕩漾都忘返扶搖自不窮披圖懷逸駕渾

欲遣樊籠

姚園夜集

步屨過芳沼披襟對友生山雲澄夕霽竹樹散  
秋清風急鷗絃勁林虛盡燭明十年簪再合不  
飲恐非情

秦淮秋泛

婉孌秦淮曲浮游畫舫輕芙蓉催送酒鷗鷺狎  
吹笙烏鵲疑飛動青龍類削成寧知塵市裏亦  
自有蓬瀛

天界寺訪陳葛二子

言尋二妙談經處觸熱因過大士林雙樹藤蘿  
沾宿雨四天鐘鼓散輕陰花間展席情先洽洞  
口看雲思轉深知已莫嫌疎散甚年來多病欲  
投簪

長干寺訪楊禮卿

海上詞人駐錦鞍花宮開宴洽朋歡百年淨土  
塵蹤遠五月空門法雨寒自識李膺名譽長每  
逢袁紹酒杯寬春風尚憶西湖路十里緋桃並

馬看

諸給諫邀飲西園

給諫存高誼名園款逐臣  
林消三伏暑花發四時春  
水檻浮杯近雲峯入戶新  
晚尊移畫舸何啻越溪濱

東園徐丈招飲

名園自昔重留都盛夏邀賓錦席鋪  
畫棟涼風吹寶瑟瑤臺晴雪照冰壺  
清虛轉愛真仙宅放達偏容舊酒徒  
袁紹昔開河朔會風流能及主

人無

邢太史邀過永寧精舍

玉堂携法酒邀我坐花宮  
竹葉流殘雨楊枝散午風  
聽歌增激烈問法悟虛空  
取醉酬高誼東西任轉蓬

金子坤過訪

宇宙誰知我經過喜見君遙將碧壺酒來坐草堂  
雲傲吏勲名淺高賢道義芬十年欣乍合詎意復離群

陳孟錫昆仲過訪

故人憐謫宦載酒過茅堂  
卷幔榴花吐開尊竹葉香  
情真忘爾汝道在任行藏  
兄弟君家好清談味轉長

贈張徵伯

早游淮海識張衡歲久驚看鬢髮青  
松塢舊開聽鶴唳石牀閒坐學熊經  
江湖落筆驚詩聖霄漢披襟見客星  
此去薰風吹壽酒洞門仙樂共誰聽

高座寺

故國重尋白馬林真僧猶臥虎溪陰  
庭栽翠竹祛炎暑座擁青蓮識道心  
漫許淵明疎禮法敢云康樂愛登臨  
高臺晚眺長風滿浪說天花墮客襟

游清涼寺赴東園公約

西塞山高四望遙振衣同上興飄蕭  
千年文藻今全盛六代烟花久寂寥  
天闕雨來雲乍黑石林風過暑全消  
歌筵忽送雙鬟舞疑是霓裳下

碧霄

書屋新城戲題八首

喜傍先人宅新成一畝宮栽花紅爛熳種竹翠  
璫瓏逕仄流朝雨簷虛度晚風早知高臥穩應  
悔賦河東

數椽真苟合一逕喜新開實稱鷓鴣臥虛蒙燕  
雀來引泉通近砌甃石起春臺卽此堪終隱何  
煩後命催

還鄉尋釣壑買地結花房日出雞豚散風迴草  
樹涼濟時慙管樂問字喜裘羊近侍休推引江  
湖興已長

焚香開別館待月倚虛闌雲雨三峯暗冰霜五  
月寒竹床湘簟設石几道書看却笑逢萌後何  
人解掛冠

微才辭廡仕小築遂幽棲乍喜林花吐旋聞好  
鳥啼石泉新水動竹戶晚烟迷歎息全身好吾  
將學馬蹄

作吏才偏拙爲園興頗深馳驅空白髮偃仰獨

青林座有陳公酒囊無季子金平生多野性不  
是厭朝簪

長日希酬接端居但嘯歌圖書螢火滿樓閣夏  
雲多老大人同嫉疎狂志靡他十年趨左闥空  
負舊漁簑

避人聊稅駕築室且藏書一笑浮雲外長吟飽  
飯餘流鶯啼灌木碧草上階除偃仰還隨意金  
章恐未如

題謝時臣山水障子

吳興謝子知名早彩筆烟霞擅工巧此圖磐薄  
知幾時萬壑千巖青不了層巒突兀凌蒼空孤  
峯秀出青芙蓉百道泉聲嚮竽籟四山松桂蟠  
虬龍石上仙人貌如玉棲真獨着丹霞服間調  
白鶴養玄姿笑把疎梅製新曲憐予十載客幽  
燕歸來祇長風塵顏今年守官條無狀天子放  
之江海間出門偶遇淡居子手持此圖索詩句  
坐觀條使心神開鴈宕孤山無乃是吁嗟人生  
貴適意富貴何時少年去他年倘遇謝吳興何

須不寫江東樹

題印岡太守所藏陳憲章梅花小幅

會稽陳君慕幽獨巧作寒花紛滿幅老幹猶疑  
帶雪霜疎枝酷似裁瓊玉陳君盤薄知幾時墨  
痕萬點光離離片紙流傳寶貞素牡丹正午空  
紛披簡翁懸車臥山澤懸圖如坐羅浮側此日  
凋窓苦自吟向來阜蓋同誰折翁家樓上名畫  
多鄴侯插架焉能過永年已遠叔用滅此圖玠  
重宜如何憐余放逐西湖去結廬擬傍孤山住

到時爲寄一枝春風流或似圖中樹

九日朱比部邀飲永寧

司寇邀賓敞菊筵瑤臺雲物散晴烟久牽紱冕  
妨幽興斲對袞袞結靜緣鴻鴈北來連舊國藤  
蘿西望接諸天傳杯落帽懽俱洽未許風流讓  
昔賢

山庄偶成

茅堂新築傍郊墟二頃謀生覺有餘淮水夕流  
平野岸鐘陵秋色映皇居高原種竹將邀鳳絕

澗垂竿早得魚揣分似宜蓬纍臥故人天上莫  
吹噓

湖臯贈周將軍

將軍聲譽滿龍庭息馬湖臯結草亭風靜竈鼉  
吟水國夜涼星月在沙汀清秋鼓柝聊乘興絕  
塞橫戈擬勒銘况是虎頭應萬里不須多著種  
魚經

秋日簡省齋督府

雞山秋晚桂枝涼督府東歸問草堂客路舊貧  
惟蕙苾名園新水卽滄浪戶庭却掃圖書滿門  
閤高懸斧鉞光擬待九重求頗牧暫開三逕接  
裘羊

送盧玉田戶部守漳州

司徒名譽久芬芳四十專城拜寵光晝日錦衣  
辭建業秋天彤蓋入清漳閭閻坐使捐刀劍城  
郭行看下鳳凰自古長才須大用看君搖佩上  
巖廊

紆溪詩

紫紆溪水碧潺湲迴抱幽人白石關把釣似登  
盤谷上逃名何啻浣花間鷓鴣瀟瀟含情麗菰  
米蓮房滿目斑想見俗塵飛不到夜涼明月棹  
歌閒

送程南樓赴鎮遠

獨愛仁風留赤縣更聞陰德滿秋臺一麾共惜  
延年去五袴應歌叔度來漢室久虛循吏詔夷  
方暫借出羣才邛山沅水行春地綿竹芙蓉畫  
裏開

游大石山同蔣林二戶部

曲河移小艇緩步訪名山危石空中結晴湖天  
際還夕陽飛鳥外清磬白雲間勝境欣同陟金  
尊莫放閒

過吳李顧二君携酒舟送

秋盡復東行窮途接友生共傾桑落酒直下闔  
閭城霜月他鄉白寒燈永夜清醉歌沾繾綣重  
見古人情

左山太守邀飲南湖

使君逢暇日留客泛晴湖卷幔見馴雉吹簫驚  
宿鳧仁風移朔氣塵世入蓬壺向夕休燃燭明  
蟾滿座隅

再入武林偶成二首

越南爲客動經年虛館重來意惘然湖外衆山  
還帶雪舍傍新竹半含烟慣趨憲府侵晨入偶  
訪高僧薄暮旋無柰白雲偏在眼中宵飛夢草  
堂前

堂開翠竹憐重到坐對黃花憶往年絕少簿書  
妨雅興獨留琴鶴伴高眠廟堂已負三千字環  
珮長懷尺五天季子豈愁無相印洛陽今有種  
瓜田

梧岡太守入覲邀飲雲居作

殊方邂逅故情歡載酒遙登白石壇天上錦韉  
勞暫駐湖邊青嶂好同看行瞻珠斗持衡近坐  
對綈袍解袂難臺省若逢休重念野人幽興滿  
漁竿

送周槐亭寅丈入覲

清時國計借專城湖上同官喜識荆四郡剖符  
存直道百年傾蓋見高情霜前入覲鸞聲動日  
下敷言鳳闕晴莫道鹽車難展驥久虛商鼎望  
調羹

送嚴玉山太守

越山冠蓋喜相從忽送飛鸞謁九重大郡政聲  
懸朗鏡同鄉交誼逼寒松揚舲夜渡金山月搖  
佩晨趨玉殿鐘此去治平須第一璽書先拜紫  
泥封

送王天台

東曹曾識通家面磊落元非百里才頗恠上書  
違帝闕漫勞飛鳥過天台三年靈雨迎軒注四  
境春花遶郭開今日政成須受寵雲程看駕鷺  
車回

送高景甫

他鄉獨客思依依駐馬憐君款竹扉旋設蟻尊  
傾臘味卽看銀燭吐清輝海邊循吏名先著江  
左孤臣願已違聞道絲綸徵召近他年休遣鴈

書稀

冬日有懷朱銘甫

盛世逃名禮樂司角巾歸臥亦多時門臨一水  
波濤靜坐對三花日月遲塵路半生驚失馬高  
堂清夜夢維羅獨慚澤畔牽纓冕柱杖從君未  
有期

訪王元宗時已赴春試却寄一首

清池裊裊白鷺群靜鎖高齋隔世氛千里登堂  
惟看竹九秋分袂獨停雲鳳樓雪散青陽轉馳

道風迴玉漏聞見說離宮多薦引君王元愛子  
虛文

送俞伯駿

維揚一別稀魚素風雨那知此地逢敢向鹽車  
悲驥足每看鳧影憶仙踪花封德政留三異瑣  
闥衣冠傍九重顧我蹉跎慙報主送君還夢景  
陽鐘

懷楊石岡

丁丁伐木自相求滿目湖山動客愁豈有大賢

棲百里翻令尺素隔三秋舊乘驄馬還爭識  
斲著仙鳧且浪游昨夜武林飛雪滿興來思  
汎剡溪舟

寄謝子

韋杜城南愧結隣十年搖珮奉清塵詎知萋菲  
紛紛日併作江湖放逐臣宇內行藏看結綠閣  
中勲業夢麒麟知君報主心同切未許臨風想  
釣綸

送程長史

來叅列郡聲名重擢侍王門寵數優入國早瞻  
尼父闕辭家爭羨李膺舟瑤山叢桂清秋迥玉  
殿圖書白日幽此去酒尊逢雪夜揮毫應奉兔  
園游

月

今夜吳山月清光寒近人酒尊朋舊遠鄉語僕  
夫親狗監書難達柴桑夢轉頻坐看弦上下未  
有定歸辰

答璿上人

重來尋寶地復此把霓旌自識山中侶翻嫌海  
內名松門雙樹老石塢片雲生麗藻勞相贈飯  
依剩有情

張甌江司丞贈詩奉謝一首

自離天北極真欲混樵漁乍喜鵷行舊還尋澤  
畔居逐臣非屈賈才子是應徐別路投佳句瓊  
瑤恐未如

附司丞贈詩

貝錦難分色多岐不辯差洛陽賈才子何事

謫長沙歲月能羈旅湖山可寄家恩深有明  
主違世不須嗟

虎跑泉

名泉說虎跑盛跡自前朝絕壁通天漢空門積  
海潮呪餘玄沫吐酌處客塵消欲訪真如偈雲  
堂影寂寥

岳墓

中原將帥失英雄王室誰收破虜功可恠廟堂  
妨大計空令邊塞抱孤忠祠堂肅肅垂遺像墓

木枝枝起怒風精衛千年同朗日厓山東望恨  
無窮

歲暮

湖西清署鎖烟霞藥裹關心早放衙四海虛名  
慚綵筆百年多病憶丹砂床頭綠酒偏欺客夢  
裏青山每到家苦涉風塵非上計江邊空老刺  
桐花

奉寄南渠中丞公

見謝鈞衡出廟廊百年仙藥鬪身強烟霞入手

青藜短社稷關心白髮長安石共期重濟世侯  
芭應愧舊升堂赤城東望天台遠負笈何年到  
石梁

寄徐東渠別駕

君游東越還叅郡我傍西湖未解官一水睽離  
惟自語千巖蒼翠不同看江邊剖鯉書頻得雪  
後移舟興恐闌婚嫁已成年各長幾時回首問  
長干

贈蔣璞山還貴州

早年三賦隔承明捧檄聊酬陟屺情經苑文章  
推子夏橋門冠蓋憶陽城倦隨銅虎浮江去喜  
見麒麟傍闕行竹葉蕉花歸隱地白頭應對玉  
壺清

寄孫學職

歲首蒙君問謫居冰霜忽訝歲將除風前苦憶  
瓊枝樹海上欣傳白鴈書賓榻久懸殊有待雪  
舟重泛定何如丹山碧水登臨地肯信年來已  
結廬

洪中翰邀登湖樓同虞東崖大理

近侍樓臺瞰碧湖隆冬邀客坐虛無殿中舊識  
于廷尉澤畔誰憐楚大夫布席攬瑜消朔氣映  
窓巒嶼壓蓬壺暫攀卿月延佳賞明日停雲隔  
道途

丙午除夕

臘盡冬歸歲欲除他鄉風物轉愁予數行栢葉  
供時序一樹梅花伴謫居游子衣衫違五綵故  
人消息斷雙魚自憐馮尉頭先皓祗恐丁公夢

已虛

丁未元日

遷客琴書滯越東三年不聽景陽鐘  
寰區正朔逢元旦江海衣冠隔九重  
勒鼎勲名空有意亡羊岐路竟何從  
病餘擬斷杯中物無奈春盤琥珀濃

人日遊湖

湖上衣冠會列仙芳時同泛木蘭船  
百壺送酒嬌歌滿七日逢人笑語偏  
水暖鷗群依畫槳雨

晴峯翠落賓筵叨陪盛地羞文藻  
不及蘇公在鎮年

正月十八日飲洪中舍宅

曲園芳樹隱樓臺偏許畸人步屨來  
四海是非何日定百年懷抱對君開  
芳菲花蘂臨歌席錯落燈光照酒杯  
歸路接羅渾倒著風流疑向習池回

經開化廢寺

不見旻公鴈字堂荒苔敗葉滿陰廊  
寰區始信

龍池劫父老猶傳寶樹光  
祗苑金銷誰結座石  
壇灰冷舊焚香獨憐挂錫孤僧在坐理殘經對  
夕陽

登六和塔絕頂

崔嵬古塔傍江千百丈丹梯手自攀近拂星河  
衣袂上下窺城郭有無間洪濤曲折蛟龍臥碧  
落迢遙鸛鶴還舍利共傳光未減金輪中夜映  
空山

登五雲山

名山高擁五雲層危磴重重躡屐登西望諸天  
應咫尺東來疊嶂總丘陵海門遙指三山樹梵  
殿常懸七寶燈便掃蒼苔題短句乾坤高覽記  
吾曾

寄蔣虹泉戶部

漢署久傳冰蘖操吳門聊試濟川才他鄉賓榻  
勞重解故里仙槎喜暫迴彩服關心驅駟馬紫  
宸翹首見三台陽山茂苑同吟地惆悵何年共  
舉杯

瑞芝歌

叅軍家住晉之鄙閉戶三年讀周禮柱傍忽覩  
仙芝生一本廿莖何纍纍莖白花黃色總芳繡  
楹雕檻爭輝光商山漢廟久落莫如何競發叅  
軍堂叅軍孝德古人上乞奉尚書別天仗八座  
雙承白首歡三公不換斑衣養後來鶴駕成仙  
游結廬獨臥松門丘晨昏負土骨已立鹿豕作  
伴來相求吁嗟仁孝能感格和氣鍾成瑞芝色  
上帝降祥非偶然一時觀者皆嘖嘖君不見姜  
孝廉雙魚躍出舍傍泉又不見孟子恭籜龍迸  
發寒林中古來孝感每如此叅軍盛事乃其比  
他年綵筆藏名山應有芳聲續青史

沈太守邀游禹穴同陳山人九臯

停舟遙拜禹王宮錦席旋開紫邏中太守風流  
康樂並才人詩思建安同蟲書鳥篆消應盡翠  
壁蒼巖眺不窮幾欲裹糧渾未得暫來猶自恨  
空匆

贈別陳山人

頻年夢寐思安道今日舟航入會稽海上形容  
還鶴鶴人間岐路幾東西休誇服食生毛羽獨  
喜江山借品題却笑王程牽俗吏空瞻丹壑愛  
幽棲

過嚴陵釣臺

富渚山高接杳冥孤臺千古想儀形幽人江海  
藏漁釣太史雲霄見客星雨散空江烟漠漠秋  
生虛瀨水泠泠自傷蟬冕餘蓬鬢多愧羊裘別  
漢廷

雜著

擬謫官到任謝恩表

丘山罪重敢望自新 天地量寬誤蒙肆赦仁  
均再造喜若更生 臣謹謝者竊念臣江南末品  
白下樗材甕牖卑門早乏金張之託螢窓小技  
素慚揚馬之工就日無緣升天有意春官四上  
文章偶冠於青錢玉殿三傳名姓忝登於黃甲  
陡沾雨露迴脫塵泥初試金科再遷膳部朴勤  
自守拙劣何功豈期當路狗名疏領九銓之寄

以致 臨軒過聽詔承三錫之音局春銜恩屏  
營就職掄才授任空懷懸鑑之明執簿呼名祗  
効貫魚之次貪泉絕飲敢祈報李於私門賢路  
久妨未免遺珠於滄海力微任重歲久過深擬  
干鼎鑊之誅竟拜金緋之寵二卿獨簡班行聯  
接于上台駟馬榮歸錦繡輝煌于下里噐盈召  
損福過貽災屬當考覈之期莫揜僉同之論謂  
臣蚊力負山才猷不逮譬彼權衡稱物品擬極  
公仰荷 洪慈俯從末減放之千里鑄其一階

罪難比於賈生恩寔隆於漢帝邇者倉皇上道  
慷慨辭家未及浹旬早臨越郡丹山碧水長圍  
遷客之居阜盖彤幃尚在大夫之後欲使策桑  
榆之景庶或收溪澗之功感忤難言遭逢幸甚  
茲盖伏遇

皇帝陛下法乾資始作解能容智急親賢仁先  
體物試可乃已寧求備於一夫罪疑惟輕不棄  
才於寸朽如臣謬戾亦荷生全臣敢不洗滌初  
心矜持末路魚鹽細政寧忘執玉之心江海孤

踪益切傾葵之念雖驚鴻落羽已知飛奮之無  
期而老馬識途自信馳驅之不倦一息尚存於  
人世孤忠不改於平生臣無任

兩浙都轉運鹽使司題名記

天下都轉運鹽使司凡六其在兩浙蓋洪武初  
卽前代舊址建署設官凡五員曰使曰同知曰  
副使曰判官判官二員東南多財賦故其員特  
備乃國初至今蒞任者紛不可記然迄無名  
碑漫漶莫考識者以爲闕典嘉靖乙巳余以秉

銓無狀謫副是司于是槐亭周公以列郡才良  
石橋陶公以名家孝德先後振剔鹽政一新公  
暇相與道故鑒往謂司無名碑善惡同腐非勸  
懲意也乃旁羅舊牒得名氏若干將立碑廳左  
屬余爲記余唯國家以財賦爲急邊儲爲重鹽  
筭固其要者禹貢遠矣自管氏以來歷漢唐宋  
鹽筭竟不可罷豈非山海博大其利不得盡歸  
於民乎我

皇祖建天立極體國經野軫念邊儲不繼佐以

鹽法俾諸商中粟邊圉徵鹽內地卒之兵食兩足疆場用寧立法比前代爲甚善以故特設都轉運使俾專領之更不別治他賦其重如此都轉運使今職三品與叅政同其同知副判階各有差使主之同知副判分司其事司各有篆得便宜關督不相掣肘乃其操羸奇籍虧羨紆縮以時歛散不爽則非使不行雖憲司歲一監臨不欲毛舉之也是故謹正鹽筴充實邊儲責諸轉運足矣其所係顧不重乎考之先初其體貌

與布政按察等尋以歲解查覈文劄相通乃漸分上下然竟非郡縣專屬比顧今好名之士汚濁財賦乃或指爲冗局視其官若贅員卒抗忽不以貌卽時號賢者苟擢遷斯署輒恟恍弗樂斯則謬矣余嘗謂階靡清濁顧職業舉廢何如耳誠使吾黨君子本以忠勤操以廉白行以寬裕察以精嚴務俾商竈兩便國賦日充斯則聞譽彌光人靡疵間雖謂之清曹可也若乃職業未舉苟且待遷卽躡華躋要豈不外榮而內愧

乎今二公所紀名氏彬彬星列雖行迹未詳而  
往轍孔著觀斯碑者將必指之曰某某公廉克  
慎流慶寔多某某總貨不飭至今爲厲今之視  
昔後之視今監戒明備豈不惕然悚也然則斯  
舉也盖有袞斧之義焉不直具文而已顧獨可  
緩乎哉二公口善哉子之言吾黨盍相與勸之  
旣而槐亭公入覲遄往石橋公躬督匠氏遂勒  
諸貞石畢初志也于時靜齋羅公以公事還自  
台曉峯李公奉部檄筮任意均淬勵又相與樂

其成云

君子堂藝竹記

君子堂者兩浙副運分司之堂也堂有竹數百  
竿昔人謂竹有君子之義以故前政名其堂云  
堂前背尊經閣閣崇聳峙旁西則群吏樓居  
居皆出短垣上破敗不葺來者惡觀昔賢樹竹  
之意毋亦有堪輿之說乎余以乙巳冬謫副斯  
署登堂兀坐清爽逼人心盖泠然喜也然往以  
守者不密人人得剪伐去其南盖已剥落乃旁

西則曠然無復存者余又未嘗不潸然悲也于  
時躬督輿阜薙其繁穢壅以黑壤漑以清泉適  
零雨下注繼以雪霰而土膏益固矣今年春穉  
筍迸出先後紛挺余適以臺檄西行嚴諸守者  
比再至時已冬孟乃新竹蒼鬱蒼翠如滴蔽積  
延袤直抵堂祀賓客來止咸籍籍稱盛因謂余  
有生物之功余笑曰維此竹樹比德君子虚心  
直節往牒稱之卽奇葩異卉不得倫擬乃使其  
斬刈獨敗失其美材苟有好德之念寧不惻然

於心乎余遵法順養非有絕智乃今生意忽勃  
歲殊月異毋亦天人默合而草木榮瘁亦固有  
運數前定不可強耶顧獨歸功於余謬矣公暇  
余因次序其意識之斯堂繼政君子亮同斯念  
願相與長養之

雨中泛湖記

嘉靖丙午余以罪放逐於武林將與箕泉王子  
訂湖山之約每苦風雨猛烈未果俄而南溟楊  
子放舟自海上至問訊謫居敦厚友誼於是慨

然命駕斯游遂勇時二月廿一日也是日零雨  
初歇旭日微映和風徐拂淡烟未收乃並轡聯  
輿憩於靜慈之上八窓洞啓四天豁然湖山青  
蒼俱在目睫寺卽倚南屏山山有恠石長松峻  
嶒震聳人語不聞松濤遞響直若萬馬騰空而  
下也人謂湖上縱觀以此山爲曠豈不勝哉頃  
之陰雲半合微雨漸零薄飲初黠榜人適至相  
與攀蘿泝堤坐於青舫之上于時烟霏迷濶水  
波滄茫群山疊岫恍惚如失循六橋而下則紅

枕碧柳隱隱有芳菲之色鷗鷺出沒於滄浪之  
間若與人狎而不去艤舟孤山猶見和靖之墓  
回視保叔浮圖微有髣髴而已幽興勃然舉觴  
無筭僕有善歌梁州者悲切可聽乃復秉燭流  
連踟躕各不能去噫嘻此可謂之人間而非蓬  
萊弱水乎余謂良友罕覲佳景難遘放浪而會  
乃成歡悰余與楊子別已六年與王子別蓋十  
有五年矣書劄相傳恨不能會今會乃在湖山  
間復值此景豈非數之前定者哉且人之游覽

必選晴霽今觀烟雨之上泛舟者幾人乃知寂寞之濱人所不愛貴在自得之耳况乎紅英半落綠陰漸成春且闌珊去矣必埃惠風和煦豈不晚哉然則吾二三人者不暢敘劇飲負於斯景多矣然二君行且登朝堂用世矣余將抱拙丘園詠歌烟月他日倘訪余於白鷺洲南握手道故豈能無感於斯會也哉

與省中諸僚書

穀寡昧謬司銓簿積罪繁多擢髮難數雖叨轉南還兢惕不置乃今大典舉行止於薄謫使自新有路蓋愆可圖非寅丈力爲庇護堂翁曲賜保全何以有此感戴感戴竊念六年之間僚朋濟濟乃今指擿屏棄止僕一人非罪大惡極宜不至是緣此倍增恐竦然穀之初心亦思勉強樹立少效古人以人事君之義不意在部支吾幸免債事而不善之狀別後遂彰以致衆口騰沸貽玷清曹爲之柰何此中別無分毫怨尤祇恐真有實跡果若人言遂爲棄物即使彌縫得

計內愧多矣無由對面特此敘心進退茫然伏  
希指教

答王槐野檢討書

別後尋以考察謫官恐左右遂棄故不通訊近  
奉教札慰念詞旨朗朗非他諸尋常問藉語豈  
尚欲僕爲全人哉僕不能矣僕本江南疎愚人  
不可大受謬領銓簿自擬速躋支吾十月僅僅  
苟全此小儒者之過非有附勢之行也若舉  
其職須四方滯無廢皆彬彬就位乃稱

公度僕能之乎必不能也京師之論文致淺深  
不同要皆薄劣所招今皆不辯尊諭乃稱僕有  
矜然之操鮮阿世之行僕以爲過矣此清介美  
聲僕嘗嚮慕之今胡可得也聞報以來循省皇  
汗實不敢處之泰然獨不怨尤耳又謫罰或可  
改過且越去家不遠音問易通今匍匐入杭幾  
數月矣俯仰偃僂禮不敢廢商竈紛沓性頗耐  
煩皆非有安土之義鴛鴦負鹽鷓鴣止棘其理  
得故其性不爲強也初意亦欲長辭終遯退保

故吾繼念嚴旨遽違非臣子體又仕宦不可揀  
擇卑官尚堪祿養故其出遂勇若謂收拾功名  
徼圖福澤豈僕之心哉豈僕之心哉孤蹤異域  
展敘無階偶便吐露滿紙亦不欲以尋常致復  
故耳惟左右鑒之

附槐野書

久違懷戀可知今兄遭罹惋困諒自不圖此  
事初出卽人人固駭視愕聽以爲極變至異  
君子當世之用所恨無柄人得之巧伺竊

窺美不爲彰加無爲有物情世路至若此可  
畏哉可畏哉今吳中兩才謝與槐氏許石城  
氏並著時名乃皆以鴻漸之翼墮于燕雀或  
曰忌才又曰數屯此兩言者皆然也石城挺  
嶙然之操鮮阿俗之行以是人言相及金惟  
堅故鑠玉惟完故微瑕得指也望遠不能爲  
情幸爲道保愛以俟後祉副此惓惓

與劉省齋都督書

在謫所辱教言清貺僕自揣朽廢不知公何所

取而念之不置也尋欲裁報聞使者有楚行僕  
亦勾當公事還家用是遲閣昨見邸報公以人  
言解印初聞驚疑歎惋者蓋不止僕一人繼而  
解曰毀譽之言變亂黑白古今不可憑者多矣  
公不見伏波薏苡之事乎平生清節海內共仰  
貝錦青蠅無足介意僕行年四十叨冒已過恨  
不早投丘壑離此樊籠公位逼上公年臨稀壽  
子孫玉立進退皆安又况宇宙之間公論自在  
指日訪求宿將安知無拊髀之思耶僕行且未  
便草率布意不盡欲言幸尊亮

祭陽峯張閣老文

奕奕元輔秀鍾江漢降岳偕靈騎箕比誕嘉猷  
淵秘華文霞粲休裕有容端凝不眩 武皇策  
士應運雄飛蚤登甲榜遂陟綸扉纂敘兼麗博  
綜靡遺卿雲遜美遷董齊微 天子曰嘉擢侍  
講幄日有敷陳僉稱耆宿典試春曹校文南國  
有舉必公非賢不錄嗣領士門禮闈兼司從容

啓沃譽望日滋乃進入座秩祀舊畿往踐台斗  
神人用熙 皇鑒忠貞式形寤寐召返文昌國  
儀明備 簡命求輔師錫靡異黃閣榮躋休同  
夢賚晉接彌隆蕃賜孔厚海歷公孤協心匡佔  
補袞維勤吐哺罔後志切經綸道先康阜天棄  
平格玄命遽移柱星告變隆棟倏摧 當宁悼  
痛蒼生涕噉鼎羹絕調霖望長違嗚呼哀哉穀  
下乘凡才雕蟲末調兩荷甄收謬魁俊造通籍  
金閨濫竽銓要翦拂恒勤高深曷報窳離非久  
續計俄傳典刑永矢廊廟胡瞻負土違心束帛  
寄衷長跼陳辭眉涕如泉

祭東橋顧尚書文

惟公文章宗匠人倫具瞻間世殊稟絕代獨賢  
甲科奪雋花縣蜚聲載游留署遂典洛京忤權  
遐謫浮湘適桂憂不忘君明以用晦朝憐亢直  
俾領台符剔蠹興利式建長圖叅藩總轄周旋  
越郡善政日新鴻名丕振帝念故壤簡公撫之  
凭几宣化全楚安居爰建山陵受命程事翼贊

輝煌民罔攸匱乃進冬卿俄遷司寇平刑維允  
仰承三宥勲庸茂馳皇眷滋深胡然厭世遽返  
元真舟楫濟川霖雨回旱群望蚤違四海永歎  
乃有傑製琬琰並傳乃有英裔鳳鵠將騫菁華  
孔灼喬木有光公雖冥逝其流則長緬惟先子  
夙荷投分小子摳衣猥承緒論膠漆比堅雨露  
同化喜附青雲謬攀高駕頃公北游臨送燕寺  
揮毫贈詩繾綣良會迨穀南還公疾初間曳杖  
生歡許以游宴儀刑未遠音響永絕茫茫天地

凋此人傑穀也無良蒙罪長流揚舲在近執紼  
何由敬設牲醪淚下如注尊靈炳若鑒此哀緒

祭太學孫曲水文

有斐吉人稟貞抱慤外泯廉隅中鮮溪壑孝友  
孔厚忠信非薄遵道而行守之以約詩談風雅  
文謝王駱旁衍六書遐探八索賢關遜志家庭  
距躍如豹隱山若珪在璞藏器既久處穎宜脫  
郡檄遙徵天門待擢井桑入夢鵬禽止幕胡厭  
塵囂遽遊玄漠一命未膺六翮先剝上善去壽

輝煌民罔攸置乃進冬卿俄遷司寇平刑維允  
仰承三宥勲庸茂馳皇眷滋深胡然厭世遽返  
元真舟楫濟川霖雨回旱群望蚤違四海永歎  
乃有傑製琬琰並傳乃有英裔鳳鵠將騫菁華  
孔灼喬木有光公雖冥逝其流則長緬惟先子  
夙荷投分小子摳衣猥承緒論膠漆比堅雨露  
同化喜附青雲謬攀高駕頃公北游臨送燕寺  
揮毫贈詩繾綣良會迨穀南還公疾初間曳杖  
生歡許以游宴儀刑未遠音響永絕茫茫天地

凋此人傑穀也無良蒙罪長流揚舲在近執紼  
何由敬設牲醪淚下如注尊靈炳若鑒此哀緒

祭太學孫曲水文

有斐吉人稟貞抱慤外泯廉隅中鮮溪壑孝友  
孔厚忠信非薄遵道而行守之以約詩談風雅  
文謝王駱旁衍六書遐探八索賢關遜志家庭  
距躍如豹隱山若珪在璞藏器既久處穎宜脫  
郡檄遙徵天門待擢井桑入夢鵬禽止幕胡厭  
塵囂遽遊玄漠一命未膺六翮先剝上善去壽

至仁邁虐魂返北固神遊京洛行路悽酸朋串  
震愕嗚呼哀哉緬惟先子忘年傾託投膠示堅  
斷金比確逮余頑謬夙承翦琢推轂無能在位  
孔忤言經仙里遽瞻總幄流水猶存高賢不作  
東遺鳳遼陽化鶴路隔泉途情深殞割爰薦  
毛侑之絮酌悲風北來涕下如屑

